

四庫全書

集部

欽定四庫全書

文端集卷九

大學士張英撰

存誠堂詩集五

古體詩四十九首

春歸日舟中三首

柳花逐東風同向春歸處今年許乞身獨惜春光暮
緋桃折一枝青淺曉含露沙岸草花間燕子飛無數
牙檣

動笙管蘭橈入鷗鷺自熬一鑪香
綳短窗聚自煮一甌茶耳畔松聲度
夷曠抒天真冲恬得吾素間持棗與
栗謹譁餌童孺悵望故山下亂花照
樊圃我方尋春來歸途值春去惟期
櫻筍時放艇江淮路

我昔遊吳門送春千人石是日傾城
出壺觴羅綺陌花市躑躅紅蠶苑桑
條碧畫舫捲簾帷春衣換締綌池邊
架月樓士女紛布席喧闐虎邱路歌
管竟晨夕一曲春歸詞聲共啼鵲惜
冶遊良可嗤簪履憎狼藉惟有惜春

心令人重紬繹

我欲營山亭衆卉列芳菁每逢春日歸折簡致羣彦芳
辰為良媒園蔬作清宴當階草不除繞戶谿常濺結幄
資藤陰鋪茵藉花片俛視文鱗遊仰聽黃鸝囀探香投
蝶羣翩遊狎梁燕醉以木瘿杯飫以青精飯偕作送春
詩續入幽栖傳如此三十年身名復何羨為我語陽春
歲當肅賓餞

擬歐陽永叔歸田四時樂即用原韻

東風隨意生春草野棠一徑柴門小節序纔過三月三
薺菜羹香朝飯飽三篙水綠陂塘寬一犁雨足田疇好
野夫自愛衿衣輕倚樹臨流聽時鳥田家此樂幾人知
更復幾人乞身蚤願言珍重芰荷裳期向漁樵覓終老

第六男阿同晬盤日舟中

首夏清和天憶汝懸弧日呱呱鳳城西賜廬邇深密今
值歲序周晝橈漾清沁江南舊風俗粒糲間棗栗嘻嘻
弄班管次第撫書帙詎敢詡寧馨青絀聊可必嘉名喚

阿同瞳子點雙漆秀慧羣兒愛常坐老夫膝好作農家
兒余方腰短鉗

放歌

月飯不盡米四斗

南史何
肩語

月飯不盡錢一緡思我於世

亦易足胡為竭屨仇此身高牙太齷聚憂患長鑱短鍤
良苦辛同為鼎鼎百年客鎔銖較量憂樂均瞿塘如馬
不可渡太行九折摧車輪若比世情猶坦途說與應須
愁殺人薄薄山田儻收穫青芻白粲糟牀新雞豚保社

少機事酒酣同作堯天民滿路松花不須買莫負黃鶯
紫燕晨

榴花貯瓶中

野岸維扁舟暖風綻榴火童子滌花瓷貯此珊瑚朶憶
我山亭邊繁英正旖旎葉叢青蟲翻枝立黃鶯安可惜
照眼姿空落園丁鎖紅雨沒層階錦茵栖螺贏朱夏渺
輕擲登舟計殊左會當白露下齟齬餐秋果

五日舟中

世憐介子推禁烟甘冷食心傷屈大夫競渡沈黍稷惜
哉賢直人未解當世惑譬彼門中蘭勸之不遺力還令
千載下感時心惻惻我今值良辰片颿挂河側蒲葉泛
邛醪聊藉駐顏色臨流投綵絲水深波浪黑矯首讀天
問憶此何窮極

郊行

性拙寡所諧蚤歲歸田園籃輿遊近郊指顧農家邛暖
暖茅茨接依依桑柘繁今年雨澤時耕獲及高原良苗

懷好風淺碧翻波痕歎彼耨者勞汗滴秋禾根我獨飽
稻梁畢世慚

君恩

陳問齋注杜成贈之

浣花谿上翁落拓著詩史會心復幾人靈光悶千禩我
友太邱生讀書冠吾里注杜平生力獨往摩堅壘遂使
少陵翁聲息卷中起注意不注詞衆論芟糟粕短章復
長謠深期發微旨掀髯時一談高言燦霞綺今年書既

成舉酒為君釀遙遙終古間兩峰永同時

問齋名式同里人能詩著

杜意

題江眉瞻太守秋樹讀書圖

我愛松下人清才粲如玉賦詩三十年鮑謝踵芳躅行吟鋤鋤潭坐對匡廬瀑今古才人宦蹟同江州司馬柳州牧君方蒿目賦春陵未許松風臥空谷平生雅嗜在林泉畫裏秋山映書綠我闢龍眠烟際峰為種青松間梅竹待子功成返舊山共住青谿飲黃犢

兩軒成詩以落之二十韻

甲子上巳日吾廬肇版築閱時彌九旬亭軒已麤足北
軒資曠爽數椽倚山麓繞屋羅千峰橫天琢蒼玉偃松
紛萬態嶺岫互連續遙岑補青靄展對如長幅水榭敞
西隅俯看清池曲梧柳覆清陰芙蓉艷繁縟中庭治閒
壤待以藝蘭菊碧澗當階流泠泠近可掬南軒迥幽宵
滿簾映寒竹微風戛球琳四壁湛深綠海棠間緋桃曲
檻穠華簇修除學圃齋補葺梅花屋經營亦已瘁聊可

避寒煥朝對嵐光餐夜就荷香宿稻畦接前邨十里散
遙矚入室延四友陶白與蘇陸白雲青山下

賜書已先告日夕愛吾廬悠然詠邁軸

短歌行

問我何所慕盡日此中居上為橫空紫翠之巘岫下為
逼人清冷之芙蓉茶甌墨沼泛松影根梢具者千株餘
嫵媚偃蹇各有態龍拏虎攫當吾廬造物奉予亦已過
食葵飲水長晏如

答徐健菴見寄即次來韻

自顧鏡中髮霜華日已半戢影栖空山遯跡託荒甸烟
雲窮物態卉木觀時變百尺寒潭碧靜對滌塵念彌望
山杜鵑高下列芳蒨喬木冠遙岑飛泉落層巘蘚石垂
釣絲藤陰枕書卷聊息蒲柳姿敢愜林泉願僕本山野
人夙昔忝

宸眷賤疴時自傷

主恩夢常戀故人在丹霄國史綜紀傳鴻羽忽遐征蓬

廬枉書翰清言粲霞綺朱雲卷河漢展讀臨松風何殊
接良讌

式廬詩為方子合山作

幽蘭翳空谷迹遠情難親自非古良牧誰作寡芳人吾
黨合山子蚤歲耽隱淪讀書務經術器業無涯垠十畝
稻花齋聊復全其真親戚罕覩面况乃車轉轉式廬久
不舉典禮賢侯新舉事敦古義能令風俗淳賢侯何以
來干旌賁城閭妹子何以告高論裨吾民採風奏太史

茲事俱足陳

合山名中履無可師
第三子隱於稻花齋

積雨

積雨竈溼遲炊烟松梢滴溜如鳴泉谿河水漲隔城市
著我聽雨山窗眠黃鸝舌澀蛙鼓鬧饑鴉挾雛啼樹顛
圃竹歌斜失行次庭萱汙溼摧芳妍臥柳根浮起高岸
蚤秧鉞沒衝平田墻傾屋漏那足惜池中墜我新開蓮
但恐雨多有時竭旱溢燥溼還相旋好築陂塘謹收護
勿教東逝歸長川

放翁于盛暑作夏白紵詞二首今夏酷熱因次其

韻

澄潭行藻如浮空柳絲搖曳生微風湘竹為簾柏為榻
橫陳碧玉芙蓉中葛衣新試冰線縷團扇停揮坐忘暑
黃鸝終日喚不休何用喃喃教鸚鵡

小亭素壁無纖塵蚤起未見樵蘇人碧荷亭亭立秋水
華清曉浴楊太真啜茗攤書晨且夕陰晴衆壑分顏色
珠簾乍捲斜陽沈嶺月團團飛白壁

子由寄懷子瞻每諷韋蘇州何時風雨夜復此對
牀眠之句甲子秋賦古詩五章寄吳門學博三
兄以復此對牀眠為韻

長夏困炎燄今歲暑尤酷平明衝草露來就山窗竹赤
日照松嶺火雲如萬燭青天鳥不飛桑陰喘黃犢南風
十日晴百泉斷飛瀑體羸舊耐暑憑几汗如沐去年冬
苦寒檐冰挂瓊玉低頭語童子天道崇往復

僕本山澤人恩遇昔無比朝暾與夕陽出入觚稜紫憶

辭文石階手捧金鳳紙撫膺傷微疴寂寂久淹此昨聞
陳瑤編問名及賤子

聖慈濡萬物不忘被簪履海內方恬熙力躋勲華美願
以朝宗心傾此澗谿水

刊易經講義英以假歸未列
名特命增入總裁官內

我有北山園荷勑理荒穢新構迎涼軒恰與千峰對烟
雲繚繞之峰峰如螺黛復有虬龍枝偃側紛衆態俯看
方塘蓮紅白分錦隊細雨出文鱗斑剝誇玳瑁獨遊誰
與歡薄俗寡儔輩念我同氣人臨風寄長慨

一官寄吳會苜蓿不充腸謀身苦無策教士端有方
臯比座嶽嶽講鼓聲琅琅大兒髮垂肩雙燕新頡頏中男
復秀慧趨拜阿叔傍幼兒如琢玉繡祿吹微香間官易
乞假寧不懷其鄉蕭蕭竹窗下方今施兩牀

弟蚤垂霜鬢兄復蒙華顛會當棄塵土耦耕原上田同
看秋月白共把春花妍獲稻釀醇醴投竿烹小鮮酌以
古瓦盆糟牀瀉鳴泉風雨萬松黑谿響如長川一燈竹
間屋相對空山眠賦詩誌吾願此事知何年

玉兒璐兒霖孫入山定省作此示之

山栖且炎熱當午羣卉薦蚊蚋苦嚙我長喙單衣穿避
此施簾幙蒸溽如火然近聞城中人喘汗皆欲顛嬌癡
三歲兒筦簟恣所便叫號言阿母不使登牀眠今朝喜
蚤涼羣兒來翩翩值我胸次惡氣逆中沸煎短衣戲我
側使我疾頓蠲璐兒先賦詩誇我池中蓮玉兒才患多
逡巡出兩篇撫掌發狂笑此樂予所偏憶兒學語時一
字亦可憐況今成七字琅琅若珠蟻老夫正岑寂三五

山月圓留兒看清影飯以谿頭鮮

寄心亭詩

北軒避煩溽看月延脩廊遠注清淺流泛我臨軒觴瑤
華斂朝旭翠蓋攢銀塘百尺青蘿峰窈窕當曲房書卷
雜亂陳一榻橫中央追念疇昔恩三載辭玉堂俾我謝
朱紱納此山中涼昔人亦有言芟荷以為裳潔已臥邱
壑寄心在

君王當軒揭斯語永佩期不忘

王子安採蓮賦永潔已於邱壑恒寄心於君王

故以
名亭

課僕種菜

堂陰有隙地荆榛初翦除當窗課老僕枕書看揮耒蚤
秋種蔓菁滋植時有餘雨過簇菜甲省視朝夕殊鄙性
癖藜藿鼎食非所須老穉慎採摘手口俱足娛含露良
清芬負霜偏雋腴物各有正味何妨鹽豉無待我蔬滿
把此樂封侯如

種菜詩用鈍菴韻

畫地為畦似枰局手種蕪菁隨雨綠露葉霜根滑且甜
一飽人生良易足垂垂豆莢韭花滋謀我冬菹尚及時
圃翁朝起眉色喜此樂今請嘗試之

放翁讀張志和漁歌因思故山隱居追擬其意予
讀放翁詩作此貽湖上仲兄六首

湖光如練萬峰青新向湖山構草亭花作鵑柳為屏家
與雙鷗共一汀

鴨綠真如瀉碧油鵝兒點綴小池幽明月夜好風秋一

家齊坐板橋頭

烟水漁樵細討論
龐公隱處長兒孫
芙蓉國裡花邨不
知何處入柴門

門迎秋水碧茫茫
紅白芙蓉覆錦塘
蓮子嫩藕絲香帶
著荷花喚客嘗

蟹佃漁郎傍水居
鳴榔齊過綠楊渠
煙漠漠雨踈踈
網船歸唱五更初

平湖風定浪花圓
兩兩歸舟向遠天
紅樹外夕陽邊
片

帆飛過小窗前

與白雲巖僧

奇峰削蒼玉萬笏攢雲端偃松皆十圍石罅恣屈盤雲
氣時蕩漾碧海翻層瀾晴晝見花雨崖巔瀉飛湍青鳥
翔佛頂雖雖如鳴鸞老僧住石龕定鐘徹巖巒天風與
相和詎作塵寰看

昔人云人生惟寒食重九不可虛度

古人珍節物佳時數重九况我居山中蕭然若園叟甘

菊吐芳華縱橫被畦畝楓柏雜丹黃錦繡冒陵阜雙屐
登雲岡一榻對松牖邨醪瀉秋露霜螯亦在手肯教東
籬花千秋歸五柳

甲子除夕

殘歲逼人事闌闌各有營獨我掩關坐心與雙鶴清水
仙側銀盤几席紛瓊英華燈燦屋角蚤梅列鉅罍積雪
照庭戶寒逼燈窗明一鑪愛長夜書卷縱復橫起弄壁
間影邈然非世情

方舒來自姑熟相訪山中

蚤春山峭寒林花猶寂寂故人枉軒車十載面驚覲束
髮友方子疑義資講析文章有矩矱名場蚤陵轢拔幟
常先登氣酣萬人敵至今盼烟霄長鳴驥伏櫪一官寄
江干六經為啟迪年年邱壠思不畏江帆迭撫摩原上
松絮醪必親瀝感慨念先疇高談常楚激酌酒語故人
古義重捧檄努力騁九衢漆髮欣未晷况有三株樹照
乘光的爍

舒來名逢月予同
學友為姑熟學博

乙丑五月寄吳門學博三兄生日十六韻

翹首當夏五
菡萏吳門花
敬持碧蓮葉
酌此天半霞
為兄介大年
聽我歌勿譁
琅琅廟堂器
識量無津涯
蚤建騷壇幟
摘詞正而葩
風雅追黃初
亦不愧專家
儒官冷鄭虔
問字趨侯芭
晴日麗臯比
春風吹絳紗
譬彼割小鮮
鼎俎試鏤鄒
終當吮鴻筆
蔚為邦國華
自予返林壑
窮谷栖谿舂
十畝藝松桂
三載友麇麇

君恩沁臍膈
未敢戀幽遐
方將理黃犢
遠駕燕雲車
何

時對牀眠汲泉同泛茶耄頤互相祝娛老還桑麻

浮山十坐處詩

浮山在大江以北最為奇特寰宇記載其巘三百有五
十峰七十有二今巘之著名可指數者尚三十餘山周
五里高不及三里洞壑盤互烟雲吐納平湖浸其麓長
江帶其前青蒼秀削凌虛鏡流固足奇也癸亥秋予信
宿其間與山足和尚極探尋之勝因拈十坐處欲系以
詩久而未就今始各成數韻地勝則情易愜境絕則語

難工聊以誌疇昔之願於不忘耳

華嚴寺後雙桂下

招提境已窮一徑入深竹百簇青琅玕寒翠冒山麓古
桂挺雙柯交枝絕凡木竒石礙飛鳥排空削蒼玉中有
藏經巖紫苔翳幽谷我來炎暑中涼颼氣長肅桂下趺

跏人但見鬚眉綠

寺後有
藏經巖

金谷巖西種茶處

三十六巖中金谷尤軒翔下建五丈旗佛身相等量峰

頂無字碑屹立摩穹蒼青鳥乘天風佛頂吹笙簧高樓
接飛泉俛看松千章滴珠復幽窅豁訝當其傍丹壁垂
紫蘿亘天如石梁山畔荷勸人坐臥茗花香

金谷巖上有石卓立

昔人稱為無字碑旁有滴珠巖綠蘿巖時有青鳥飛來鳴於巖端

紫霞關下

空山一片石鴻荒劈巨靈疏鑿非禹功無乃勞五丁天
險既已闢山翠無時局從此陟丹梯樵路穿青冥喬柯
散佳蔭憇息如郵亭上有仙人牀偃臥期千齡

仙人牀石在闕

上

首楞巖

振衣紫霞闕首楞在其上如登燕子龕地狹景彌曠九
子隔江峰青蒼鬱相向鴈侶落平湖漁汀沒秋漲古木
參差中烟光渺難狀側足度危岑苔滑不容杖尚有舊
遊人姓字留孤嶂

鍾伯敬
輩題名

石壁題云望九華若筍長江如帶遊
浮山不遊首楞不如無遊石險處有

石龍峰松下

奇石亘長谷蜿蜒如石龍延步儼崇岡仰眺成危峰如
臥復如攫磊落千歲松下視晚翠巘蒼莽豺虎踪斜日
迴紫翠百疊青芙蓉我欲謝塵滓夕景長扶筇

下看晚
翠巘極

幽情人
跡罕至

陸子巘前竹下

長廊名浩歎石窟尤離奇天然闢戶牖烟景相蔽虧窈
窕如曲房映以檀欒姿微颺戛脩玉蕩日如淪漪曾有
探奇人高咏天風詩遠公亦已去浮圖冠屢屢復聞歐

陽子來與高僧基至今烏啄木響落空山時苔痕蝕棋
局黑白誰能知

陸子名宰山陰人雷鯉詩有天風醉花鳥之句歐陽公曾與遠錄禪師圍碁於

此有石屋名浩歎廊

指月石

躡步攀枯藤言登指月石誰關奇險徑巨斧生履跡垂
手摩松顛沆漭山雲白陰壑轉幽邃羣岫互奔繹迴睇
石蓮峰仙葩粲朱碧天池劃澄泓雲半段葦積欲畢探
奇情扶攜藉禪客

石蓮峰上有石紋如蓮數十朵大盈丈紅藍悉備雨後洗石則益見峰頂

最高處有天池四
時不涸中生葦荻

佛母巖石楠樹下

海濤迴天風乃從石上生始知造物力搏掬非恒情亦
號連雲峽青壁類削成朝暾與夕陽丹霞彌赤城猿鳥
絕行迹烟景相縱橫我來佛母巖對此心魂驚欲書貝
多葉壯觀難可名

海島巖有石如城長里
許上有紋如波濤涌起

響雪橋

張公昔隱此泉有丹砂香左跨繞雲棧石磴懸崇岡右

帶響雪橋潺湲落谿梁千巘莽回互天地皆蒼涼或有
鬼神守荆榛閔靈光延緣石橋望幽絕誰能量徒聞夕
陽樓遺迹空渺茫

張公名同
之宋人

妙高峰石上

子瞻詠廬山欲識廬山面余登妙高峰茲山迺全見鳥
道亂石叢得松意彌倦貽愕經時定甫敢送遙盼巘壑
蕩烟雲丹碧陰晴變邨樹青數叢江雲白千片短松號
晚鴉竒觀怯深戀殘陽照歸影南湖淨如練

題周廣菴漁艇圖

春江無際扁舟小
風動漁竿何嫋嫋
桃花流水鰕魚肥
最憐此句詩懷好
筆牀茶竈伴幽人
白鷺青山同縹緲
閱盡天涯行路難
人生只合烟波老

文端集卷九

欽定四庫全書

文端集卷十

大學士張英撰

存誠堂詩集六

古體詩十九首

山靈代梅語

南殿秘閣爐火溫盆梅新綻香雪繁
抱書擁裘坐花下
此身忘卻居天閣
矍瑜坐暝春夢逼
遭花勾引山翁園

低枝窈窕垂碧沼老樹欹側當閒門度嶺一步香徹骨
何況坐臥融神魂山鳥一聲山月白霏微煙溼梅花邨
老翁此時復何處擘衣狂敲石上蹲落花千片如舞雪
等閒堆沒長松根拊掌得句向花說似詩非詩憑較論
兩度花時主人出舊山路蝕蒼苔痕枝頭疎密復誰數
雀翻鴉啄空黃昏山靈移書代梅語心同芳草思王孫
衰傭合向此中老放歸蚤乞

明主恩

除日憶園梅用子瞻韻

短牆碧礪幽人邙古鐵作樹香為魂凍蕊猶黏曉霜重
高枝初破山月昏先生自愛樹圍屋路人爭指雪堆園
看花有時勿孟浪寒消香轉需微溫山溪樹密曦影遲
麥飯既鋪迴朝曦花鬚乍舒花瓣簇珠光照戶香塞門
我昔居此竟三載相憶那能無一言祇今春風已十日
一枝未見臨匏樽

題徐公肅先生小像

清高金莖露正直朱絲絃敬藉少陵語再拜題華箋朝
野仰公望太華凌紫煙山島自疎峙浩澹如長川寵辱
驚世人詎能汨其天霖雨未滿區惋惜成華顛清風聞
坐歎偃仰梧陰偏雛鳳遠其側的爍昏珠蟬且操汗青

筆點抹生民篇

時方監
修明史

李厚菴歸省送之

皓鶴振脩羽來從海雲碧遽以蘭陔情中腸自煎迫相
別觚稜間執手吐胸膈獨有

君親恩慚汗動心魄疇昔常語我報恩非一策但存區
區誠勿復論形迹耕鑿為堯民亦以疇帝澤或為漸于
磐或為介于石惟此忠與孝畱芬在簡籍君行侍華髮
承歡愛晨夕處則為曾閔出當儷旦爽計君還家時余
亦整雲翮

題惲南田花卉冊子二首

紫藤花

山中紫藤花彌蔓滿巖谷樵人不知惜刈以束樸樛我

獨披荆榛移植傍庭屋青絲長數尺延緣登灌木花時
穗離離百琲紫瓔簇風入致翩翻露重氣清馥採摘芬
可茹候共春菰熟會當成虬幹藉以媚幽獨

荷花

我昔垂簾坐清夏當砌冷泉流石罅平川十畝稻花中
小作橫塘臨水榭碧水新開一朵蓮半闕半掩騁嬌妩
流鶯喚起午睡醒茶香細啜簾影下復有峰頭百尺松
撩人影入花瓷瀉餐香飲翠恰三年造物嗔人不相借

祇今蓮子憑誰拾風涼露重紅衣卸

寒夜

寒夜熏短衾熟睡遂言歸夢我白頭人歡聚忘酸悲
辟彼舊雞犬門巷不知非回頭數松竹歷歷無忘遺庭鶴
刷鮮羽長鳴相追依思苦易為夢斯理何庸推萬物良
復故所悲年歲衰何當返山澤長為時所麾

寄木厓

碩人寄過軸高風在河壑列笏插諸峰開襟俯平楚衡

門倚清流茅檐接花嶼孤亭延景光
淡竹祛嚴暑中有嗜古人百城同
寢處奇文燦天葩七襄入機杼賦
詩登黃初笙鏞間祝故才高遇彌
耆彈冠慙白杵今年七十翁道氣
日騰舉清泉白石間聖賢作徒侶
欲寄生日詩逡巡拙詞語自昔渭
南翁澹蕩若耶渚萬首古無儔篇
章號鴻鉅耄耄氣益遒目光炳雙
炬平生所伏膺願言持壽汝牛腰
端可壓鶴背亦堪許

寄霜鶴

襄陽耆舊傳卓犖推左思千載寒知閭清風常在茲移
家居谷口柴門環清漪古牆護溪竹碧玉寒參差緗梅
百年樹偃側當階披摩詰久獨處性與丘樊宜左廂貯
茶臼南榮啟書帷蓑笠自淳古霜雪燦鬚眉冥冥霞際
鶴軒蓋安能溜我亦有茅宇結構西山陞旦夕過谿上
邂逅惟相持鄙志景高潔雲壑貞松姿五年賦契濶舊
柯繁新枝何當棄塵累高翥會有時陰巖富蒼木陽陂
多紫芝相期各善飯采藥長追隨

寄題美湖龍眠山莊

衆峰縈一谿曲折十餘里澹沲煙雲寬窈窕林壑美中
有最古園迴環抱清泚細路緣山椒垂藤接步履雲根
削青蒼苔痕澀殷紫酷愛茲徑僻信可界塵滓河聲西
南來石梁何齒齒人語近不聞隔岸飛濤裏曩昔偕來
遊荒途入荆枳予方卜築初君亦經營始亭因果蔭偏
樓緣杏花起列果樹美箭灌蔬藝芳芷園林日以佳慙
予去如駛比聞更撰勝幽巖得奇詭疏鑿老不疲自荷

金鴉嘴定當烹肉芝還將吸石髓嚶嚶求友生招招待
舟子獨寐同寡懽延佇兩無已埽我噉耕堂從君閱耘
籽

北軒後種竹得筍

植物數清芬簞推第一種類復區分中有堅韌質一
竿圍尺餘十丈高無匹煙梢葉葉奇霜節莖莖直莖含
澹蕩風葉透玲瓏日陰搖暑月寒翠滴晴雲溼雪壓與
風推亭亭無偃側所嗟樊圃間尤物艱種植竹祖雖頻

移龍孫非易茁北軒有孤幹逾年忽增十園丁遠相報
開書動顏色始緣礪壑疎終繞階除密坐對一林香端
可忘肉食會當置匡牀晚翠映書帙

玉兒書來道小谿兩岸種桃柳百餘株

草堂帶山麓門對清淺谿迢遞松嶺北曲折花邨西最
宜臨水處柳徑與桃蹊綠蔭漾清沚紅雨蹋香泥波底
戲文鱗枝頭鳴黃鸝浮梧落英滿垂釣濃陰低雖無泛
舟樂足令遊筇迷十年畜此願此願多乖睽昨日山中

信阿玉自封題種桃倚短岬植柳眠長隄桃試紅萼小
柳翦青絲齊春風日滋長芳景端可俟他日西谿上幅
巾堪杖藜

讀道書二十韻

學禪成大覺服藥登上僊蓮臺挂珠絡鶴駕凌紫煙二
者信可樂樂在超人天以余忖量之樂不如歸田收得
不貲身謝此區中緣急埽巖畔屋高步谿南阡雲嵐與
煙翠攢簇當我前飫以青精飯濯以丹砂泉胸懷自開

拓耳目皆芳鮮一日驚悸去二日憂煩竭三日視聽泯
有若嬰兒然渾渾寒螻蟄蠕蠕春蠶眠不醒亦不寐真
息長絲絲化如入水崔蛻比經秋蟬頓使凡骨換還覺
沉疴痊豁然一長歎躍出羲皇先天地領空濶日月忘
推還手攀河漢流足蹋崆峒顛崢嶸憫羣動螺贏視豪
賔苟非知道者斯理不易傳

追懽

古人言追懽其義當何居將謂衆人樂而我與追隨將

謂懽易去努力追逐之好花開易落好月圓易虧賓親
正聚首倏忽生睽離山水甫登躡陰晴未可期翠管歌
復歇紅袖舞還垂朱顏照青鬢瞥眼生白髭何況塵勞
事如蠶自吐絲微軀苦縛束纏絲無了時懽情良有幾
疾如流電馳捩焚與拯溺未許須臾遲嗣後偶逢懽高
興誓不移園花爛如錦庭月圓如規林壑得佳趣故人
懽相持或遇良讌會笙管佐游嬉或遇閒歲月擺脫塵
事羈縻此如拱壁百慮一時麾掀髯舒寸心放歌豁雙

眉臨風發千笑仰天傾一卮詎可當前失徒勞去後思

人生

人生譬石火倏如流電驚日月無根蒂東躍忽西傾達
人解其意流光難與爭借彼豪端字寄我心中情言歡
若涉笑寫歎如有聲萬類羅腕下一字分枯榮麗如春
葩發皎如朝霞明翠如新竹竒香如芳蘭莖宛轉說哀
怨曲折如流鶯倒翻滄海瀾吞吐如長鯨江山資潤色
河嶽憑精英千篇任瑰偉隻語堪縱橫一片性靈光抒

寫寄太清太清無窮極誰能磨其名君看陶靖節萬古
如平生

官道

高柳一行直其下臨官道風起霾塵沙雨過積淋潦半
夜露未晞亭午日方杲但聞去來人馬蹄蹋秋草烏栖
恨不遲雞鳴恨不蚤微聞柳陰中歎息有邛媼今年騎
馬客者比去年老人生非金石齒髮誰能保莫自逞丹
顏寧得幾時好

上真定梁公

百川趨溟渤羣山仰崑崙萬類皆有託而況吾道尊鉅
公起河北嶽峙聯弟昆勲業冠諸曹四十歷寒暄秉軸
際昌期元化日以敷民氣入鈞陶薄海躋春溫文章燦
天葩脫腕皆瑤琨蕉林美詞翰吹氣如蘭蓀歐陽金石
錄榮光燭庭軒俛仰極千古退食恒埽門皎皎貞松姿
雲際安可捫霜翰數十圍撐拄乾與坤萬籬本微弱附
麗亦騰鶩翹首望丹壑永荷涵濡恩

送健菴大司寇歸崑山

滄沱水初泮春風吹柳陌故人去京華翩翩振羽翮傾
蓋遡廿年吳會雙泉宅玉堂喜追隨聯影槐廳席丹黃
秘閣書十載數晨夕猥以蒿蔚姿挹領椒蘭益君才儼
江海巨手光典冊寰中照碑版落腕流金石置身萬卷
中精英日搜索唱歎皆古音結撰卑時格雅樂鏞球陳
凡響荆榛闢

至尊獎文教薄海事經藉君用儒術欽激賞尤弗釋祇

以承恩深轉使陳情劇鴻帙藉編摩移局近山澤依然
黼藻功謾詡煙霞迹牛腰載秘文茲事罕疇昔擁書林
屋溪滌硯花谿碧我亦乘秋風相從訪遊屐吮口與吳
閭春江共潮汐

新秋

昨夕雷雨過郊原何青青新蔬三兩畦濯秀當我庭日
澹雲影薄飛蟲隔疏櫺枕前茗椀淨手中紉扇停身心
兩閒適午夢微涼醒

文端集卷十

欽定四庫全書

文端集卷十一

大學士張英撰

存誠堂詩集七

古體詩三十首

白松十韻

白松挺奇質高格無纖埃如對脩潔士雋整愛丰裁青
銅點朱碧斑剝古尊壘聳幹若凝雪蟠根疑積苔鳳毛

聲瑟瑟龍鱗色皚皚玲瓏曉日映瀟灑天風來近樹吹
微香肌理神僊胎允宜白鶴觀只合吹笙臺百尺瀟湘
竹風度差可陪回頭看榆柳瑣屑皆凡材

勺園牡丹甚盛三兄新作小軒對之花時觴詠其
中有懷勝賞因寄以詩

城南方塘淨如練密卉疎筠列芳簪主人舊種洛陽花
百朶春深壓山縣近添幽館對芳叢曲徑朱欄藏宛轉
此花夙昔性所耽六度春風不相見聞道年來色轉奇

綃堆繡簇霞千片香風粉膩楊妃脂露華紅溼西施面
朶朶葳蕤赤玉盤枝枝搖曳錦團扇吳門先生浮大白
細把微吟足歡讌寄語春風作意妍明年一倍增嬌茜
不分天涯作客人歸心輸與雙梁燕

芙蓉島詩

繭帷幽夢逼清曉僊人相喚芙蓉島此地真堪來作翁
谿光十里如霜縞數峰窈窕落平川淼淼雙流入懷抱
春巖秋嘯四時佳雨岫煙繚終日好蟠松古枿影谿斜

枝葉交加蕩文藻手種芙蓉萬朵花霞光一片朝陽杲
石罅低藏漁父竿松陰側出樵人道中有竿絲十畝田
土暎泉香發杭稻沙鷗魚翠時時來滿徑落花常不埽
荷鋤為農三十秋自斲黃精餌芝草玉井花開十丈蓮
霜林果剝如瓜棗醉時笑拍洪崖肩與爾風流成二老

贈王鶴汀學士

潤比良玉質芬若幽蘭情夙昔愛君子高潔心所傾兩
度涉江水芳洲采蘼蘅朱弦疏越間唱歎皆元聲紈袴

祛陋俗寒暄列嘉名千古秦淮月長同水鏡清

勺樂貯甌餅中小有佳致

虛堂下疏簾槐影漾深綠數朶殿春花鮮麗簇紅玉濯
以溫泉波華清正新浴無計遊豐臺千畝恣遙矚聊向
花瓷中經旬看亦足山亭紅藥欄苦憶銀塘曲

與近公有結屋避暑之志異時苟遂此志當諷斯
篇

我有數畝城南坊頽垣斷岸圍方塘三年苦旱泉眼塞

淤泥龜坼苗苗傷今年春雨喜沾濡濺濺波動鳴石梁
碧筒萬挺羅翠蓋水芝百朶披紅妝曩時種柳隔闌閒
寄書已報陰覆牆會當結屋避炎暑穿林跨水延脩廊
南榮近接雙梧桐西隅高擁千簷當芳隄十丈偃綵虹
芙蓉四面亭中央小舟鷁首青油幕平橋鴈齒紅欄裝
要闢水南一區地窈窕叢桂藏曲房桃李竹几隨處有
茗椀詩卷長相將垂簾終日坐溪翠投竿有時臨夕陽
思我此時飢荒圃門臨官道車塵揚炎風畏日射窗罅

矮檐尺樹同低昂
譬彼冰壺說爐冶
益令肝肺生清涼
人生適意須有時
俛仰勿悲頭上霜

澤州先生過郊居贈以詩即次原韻

西巘紫泉宮直廬
隣鍵筦地僻解朝紳
當午幸不綰敢
冀竹林遊籍咸同二阮

時攜姪瑩在西郊
原韻小阮指瑩

槐柳夾路隅

美蔭不須選平疇
新雨過鮮翠堪擷攬
清旦高軒來玉
山照蕪館句比江峰
青心共鎖雲遠重以
譬龍筆金碧
相組纂衝暑走銀鹿
好我意殊善氣懾雙
明珠報章不

辭緩

送六姪廷瑩還桐城

平生愛誦東坡句，犀角豐盈美遲迨。七年驥子不相見，
來值予方在瑣闥。入門急喚問平安，撫視摩挲燭再跋。
惠中秀外敏且愿，世路人情皆朗豁。土銚與我對牀眠，
絮問江鄉夜常貼。長夏扈從來郊垞，攜爾同行撥古枯。
從來魚稻飽甘鮮，強同阿叔餐粗糲。千端萬緒在名場，
識破天倪緣宦達。譬彼蓼虫生芥畦，難向蠟蜂語辛辣。

爾翁林壑自俛仰老我東西苦塗抹會當奮翮學冥鴻
蚤晚朝衫應可脫隔牆花氣共霏霏比屋池流同活活
弟兄老矣皆霜髯里巷過從任袒褐惟應對客稱好好
母事向空書咄咄送爾先逐秋風還東渡黃河經木末
爾翁相望秋月圓桂英滿地香堪掇予且飛章許猿鶴
相違莫訴江天闊

東坡與姪遲适有
犀角豐盈之句

七夕夢中得首二句因續成之

秋水鴻鴈多秋江濶如許我欲乘輕舟采采芙蓉渚津

梁不可越羽翮奚由舉含情渺何限寄書託魴鱖譬彼
牽牛星隔河相爾汝

良足樂同靜海勵先生

何必思故鄉郊居良足樂曉起推南窗青翠滿寥廓井
畔柳纖纖檐際花灼灼東隣未已秀西莊穀可穫短衣
步夕陽入眼差不惡起居復何如昂藏兩髯鶴漸喜公
事稀高眠聽牛鐸蔬嫩翦芥菰飯香參鱠飪子弟間從
遊邛醪時共酌睡蚤嫌月遲夕涼腦衾薄人生攢百憂

譬彼筍纒穽長往信不易小憩豈容錯且作歡喜緣暫
解憂患縛思鄉令人瘦飛書謝林壑

題漁父罩魚圖

菰蒲葉綠湖水清
唼浪遊魚逐隊行
漁翁有篚編竹成
煙中小艇波無聲
等閒拋落魚不驚
香萍文藻仍縱橫
魚兮魚兮怡爾情
勿用潑刺鱗尾赭
三湘七澤秋盈盈
蹄涔一勺亦澄泓
聊復喁喁樂其生
有時潮長陂岸平
秋風鼓浪苓箬輕
看爾澈澈還東瀛

對菊四首

吾生寄大塊萬慳惟一開今年秋色裏退直常掩關霜
圃有佳卉移植開我顏不謂搖落候風姿絕人寰縞素
冰雪皎紫茜雲錦殷芳叢置几席坐臥寒香間但得悠
然意何必見南山

雅尚愛林壑夙昔多遠情一自撓世網展轉亟相縈寶
閑逾良玉寸晷非敢輕意感造物厚秋草發奇英天地
有正色斂手對霜莖攤書度朝晚濁醪還自傾

我意營傑閣尸祝有四公陶白與蘇陸澹蕩高人踪樂
天雅天趣水竹洛城東世路困子瞻皎皎若孤鴻賦詩
多逸響萬首龜堂翁近道貴自然洒然塵滓空頽首柴
桑老真味獨醇濃

客自西山來歎息秋光好霜林燦霞綺異采朝陽杲駭
愕誇雄觀鋪張令人惱顧我七年來山林迹如埽庭陰
轉眄移良辰惜草草惟對一叢花長吟寫幽抱

園花十二候歌

予既以十二花為候編輯小月令因作此歌命小郎廷
璩廷璿習讀暇時則令其更唱迭和以云幽人鼓吹故
有取于詞諧意淺童子可歌老嫗能解遂不以鄙俚為
嫌矣

立春梅蕊正芳妍
映閣深堂半下簾
自昔寒香比高士
由來萼綠本神仙
香雪草堂三十樹
蒼枝古幹破山煙
玉雪岡頭春似海
閑披鶴氅看花田
解一二月邛南杏花
白粉腮
檀口看微坼
細雨輕煙放轉遲
晴雲曉日光初

射文杏廊前錦覆檐春暉閣上花侵席一夕東風春草

生繁英亂點東西陌

解二

三月穠華屬海棠輕盈佳麗更

無雙曉向朝陽翻錦帔夕燒高燭照紅妝枝嫌玉蕊曾

無態色妬梨花合斷腸試向小樓淡處立不須遙羨碧

雞坊

三解

寒食人家竹林裏桃花處處低臨水曾聞玉洞

隱仙人還向清谿賺漁子紅欄橋畔間疎楊綠樹邛邊

伴穠李等閑千片點淪漪池面春風吹不起

四解

穀雨名

花是牡丹千枝金粉壓朱闌春熙堂畔青油幕曉露光

生赤玉盤春到花時晴雨易蝶迷香國去來難姚黃歐

碧潛谿紫繞砌容予盡日看

五

芍藥殿春顏色好櫻紅

筍綠荷錢蚤春情盡付洛陽花婪尾餘芳偏窈窕曲徑

長廊蔭古藤荷耒自種將離草賞花何必金帶圍不須

多費天工巧

六

五月榴花火樹然河源佳種昔流傳烏

桤葉經秋露赤佛桑花破嶺雲鮮幾株斜映清池岸萬

點丹砂涌碧泉小院日長紅滿砌綠陰淡護紙窗眠

七

六月荷葉錦塘曲翠蓋紅裳氣芳郁綠水亭亭一朵開

太真曉向華清浴扁舟淡入藕花叢鴛鴦宿處花房簇

晨昏餐飲水芝香謾向神僊學餐玉

八解

桂花開日香滿

城六經堂外交柯生枝垂金粟陰常密露溼天香夜轉

清雲外月輪當夕滿人間秋色此中分微雲冉冉鶴欲

下定有僊人吹玉笙

九解

菊花時節尋霜圃重陽故作霏

微雨移植孤根古瓦盆頓教水閣成花嶼天空木落羣

卉推別有幽姿偏媚嫵世間蜂蝶繞朱門何曾解識陶

家墅

十解

十月芙蓉傷水開拒霜原是不凡材茆亭四面

綃成幄松館千叢錦作堆北渚南汀隨意種淡紅淺白

間行栽蓬壺自有僊人島何不長吟歸去來

十一
解蠟梅

開近寒時節雪屋紅鑪稱狐潔巖蜜攢成點額花水沉

香透檀心纈紙窗誰與助清幽朱果垂枝枝欲折一斛

珊瑚照夜珠空庭堆滿鵝毛雪

十二
解

為君數徧四時花

金谷平泉底事誇十畝林塘居士宅一簾風月野人家

但求暇日身無累不管流年鬢有華願得常為農圃客

幅巾筇杖老煙霞

十三
解

廣園花十二候歌

既為園花十二候歌凡羣卉與之同時者咸屬之以此
十二種可以多植成林其他則參差掩映乎其間有主
客陪貳之義焉小草蔓生承跗接萼益態增妍良有取
也復作廣園花十二候歌以繼之

名花十二管流年藻續風光又一篇借問梅花誰作伴
水僊孤冷恰相憐瑞香紫蒂銜枝小最宜插鬢香雲繞
別有金英點翠條憐渠亦解迎春蚤

一解杏花枝畔綻櫻

桃木筆辛夷玉樹高幽谷蚤蘭初破雪香風一夕滿亭

皐

二海棠誰與爭芳艷梨花月下依稀見嬌姿尚有水

林檎學弄春情殊婉孌

三

天桃僊李好同時荆樹繁枝

點綴宜蕙草千莖圍石磴丁香一簇覆柴籬

四

牡丹富

貴真無比繡毬八寶攢珠蕊三千粉黛護龍綃水晶宮

闕差堪擬鶯粟平鋪作錦茵薔薇結幄罩香塵翦春羅

巧醺醺瘦更有虞兮號美人

五

芍藥春殘夏猶淺杜鵑

花照東西巘木槿籬邊蕊乍紅芭蕉窗外陰初展

六榴

花風溫萬綠稠素馨新上王搔頭小摘露葵堪作饌頻

看萱草解忘憂

解

荷正芳時筠粉碧紫薇簷蔔交紅白

水亭四面列秋蘭晨夕香薰嶺南客艷艷桃開夾竹花

合歡葉密映窗紗雞冠鳳羽渾無賴屋角牆陰一道斜

八解 嶧桂香濃風露冷綠橘黃柑共清景玉簪叢裏斷腸

花夜伴疎桐落金井

解

菊花風味迴無儔凡卉誰能耐

九秋錦覓葉燒溪院寂水紅花覆小池幽

解

秋風秋雨

芙蓉國錦城萬嶺丹楓色殷紅茜紫間蒼松穿雲跨水

奇何極

十一解

花時最是蠟梅寒黯澹枇杷不耐看幸有

山茶紅似火清宵共度雪漫漫

十二解

閑花浪蕊尋常有

乞種分栽動盈畝平章秋月與春風萬紫千紅娛一叟

十三解

荷耒帶鋤總逍遙餐艷披香也足豪薄構小園誇

庾信多求異卉笑文饒淡知鄙性原成癖難索傍人為

解嘲自笑自吟還自樂他時應譜入風騷

十四解

芙蓉島十二詠

松隄

雙澗夾平疇長隄堰谿水手自種山松千株蔭清泚中
橫樵采徑人行翠微裏谿聲有時靜日夕松籟起

芙蓉汎

經歲植芙蓉娉婷泣秋露松際亘花城一抹霞光曙下
臨清淺波盈盈嬌欲語有客問衡門只在花深處

青槐陌

言度芙蓉城槐徑延溪入脩條散清陰玉樹參差立日
影不到地幽杳蒼苔溼時有耕稼人閑來挂蓑笠

連谿

大谿西北來交流經石堰曲沼貯清泉綠荷點千片緬
想林下風謝女落金鈿何緣溪山中臨波見芳蓓

北玉雪岡

北阜何坡陀種梅繞山麓春鳥時一鳴寒香滿幽谷寂
寂茅亭晚齒齒石徑曲會攜陶令詩披裘雪中讀

南玉雪岡

崇岡倚石谿側近椒園道古梅間松杉詰屈樹偏老一

林晴雪霏十日春風蚤惟有山翁知破寒事幽討

杏圃

文杏怯春寒高枝烘暎日艷艷紅粉妝牆頭美人立輕
煙繚繞之態慙若無質桃李步後塵覲面應自失

桂叢

南隅入短垣巖桂盈一畝山空秋露白埽花擁篲帶芬
烈侵衣裾餘香發樽斝淡宵對涼月清景兩無負

蘭皋

雜草藝蘭叢孤芳欣有託
光風泛紫英香氣滿林壑
班荆對幽人銜露偏綽約
古稱同心言應難逾此樂

竹垞

餘地翦榛蕪臨水堪種竹
翠莖照白沙髣髴淇園綠
高節飽風霜清陰蕩炎溽
時聽戛玉聲藉以療吾俗

薇館

閣前宮樣花移植清池上
愛此鸞鳳姿臨風解輕颺
誰能經十旬璀璨紅珠帳
高館日正長攤書永相向

楓亭

略約渡小谿數楓圍石磴一夕江鴈飛霜葉紅滿徑錦
繡倚晴張茜紫經寒凝步履登山椒秋聲飽清聽

李渭清侍讀為予言滇南龍泉觀水泉之奇賦此
昔遊躋突泉奇峰出波面如雪復如玉噴薄珠常濺清
濟水性彊狀流能隱見今復聞滇南澄潭水為綫日午
涌清池環匝如素練潭廣不逾丈紫鱗千萬片中有小
黑龍目睛如掣電造物信耽奇搏抗窮物變翰林奉簡

書天南遠乘傳為予話風土媿媿坐忘倦幽勝許旁搜
斯遊足嘉羨

文端集卷十一

欽定四庫全書

文端集卷十二

大學士張英撰

存誠堂詩集八

古體詩四十首

東西龍眠山二十詠

吾邑西北倚山麓為城出宜民門取道於大士巖行數
里渡谿河左則越巢三都館右則青埠潭左氏昆弟居

之兩山低處中橫一徑吾詩所稱谷口是也居民數家
酒帘邨市樵子出入所經弛擔結侶咸憩息於此自此
而玉龍峽為東龍眠徑越嶺跨礪至似古山房泉源在
焉石馬潭為西龍眠徑層巒疊岫倏忽開闔至社壇而
宵然溪矣凡予足跡所歷各為六韻以誌之餘請俟之
它日

大士巖

山縣枕崇岡數武即丘阜懸崖斧劈痕臨谿彌峻陡澄

礪浸雲根石龕若新剖曲磴緣翠竹方塘涵碧藕時有
出郭人來遊挈罇正是吾入山徑幽意恒揆取

河墅

孤亭冒山巔素琴發清響蒼蒼原上松翠蓋供俛仰潘
子晚好靜結廬寄霞想詰曲入花徑窈窕闕書幌南榮
與北牖容膝不希廣予駕趣北山筍興習來往

山巔有
皆響亭

越巢

古牆辟荔衣檀欒倚修竹路入老樹西門對清谿曲時

聞讀書聲中有幽人屋梅花几席香萱草階除綠有容
皓鬚眉脩然常野服昔賢遺烈在清風滿巖谷

堂曰舊學左忠

殺公讀
書處

青埠潭

言過谷口東一水湛深碧對面青蘿峰松陰落沙磧素
鮪遊空明波紋蕩奇石昔聞堰谿水畫舫堪挂席祇今

春草深青苔迷往跡千載烈侯祠寒林亦蕭槭

英烈侯祠在其

側

三都館

垂髫遊龍眠癖愛三都館野橋入平田松關客常款幽
巒亘四圍穿林自夷坦美箭上千雲十畝清陰滿結廬
雖不多風神自蕭散喜與人境疎長吟縱吾嬾

玉龍峽

我昔在內府得見公麟圖蒼莽玉龍峽雪瀑如濺珠此
地水石佳名與圖畫符陰巖攢碧樹幽響中笙竽逶迤
林壑間常若匹練鋪何當山雨中來觀此景殊

杏花邨

吾祖松楸地自昔名花邨連蜷好峰聚噴薄清谿翻傍谿住老叟喬柯蔭柴門耕鑿數百載世世貽子孫陵谷萬事改衡宇今常存春風過陌上笑指桃花源

桃花洞

姚公讀書處高寄煙雲端古屋紫苔澀溪林白晝寒脩竹徧陽陂百簇青琅玕凌礪架危閣牀下飛激湍更尋水源地奇石尤巒岼徑滑不勝步扶攜來撥看

姚端恪公讀書

處

似古山房

自昔聞戴顓空山有幽宅閉戶賞名泉奔流在肘腋翠
篠青林中懸瀑高百尺旁構響雪亭手揆練光白添衣
坐溪夏山風謝締給每當炎曦時懷此不能釋

昔為隱士戴髡

僧所居

石馬潭

結屋龍眠西沿谿路偏好峰巒莽迴互水石相環抱石

馬立空潭洄波紛素縞曲磻盡文魚幽徑皆香草但聞
樵歌聲相和白雲蚤曳杖躡青鞵期向北間老

媚筆泉

山頂有名泉厯落層雲間昔人揮毫素滌硯愛潺湲遊
客稀偶過老僧常掩關別有羅漢臺紫翠何其殷巉石
栖短樹倪臨流水灣石上垂雲字久沒苔蘚斑

字苔蝕
久矣

石上有
垂雲泝

賜金園

言陟夏佳嶺遙見入林路清池當衡門影落峰頂樹竹
溪灌木稠畫眉啼不去荷鋤杭稻田抱瓮耘芥圃黃犢
近隣邛綠蓑好風雨古屋兩三楹是吾閱耕處

芙蓉島

岡巒勢蜿蜒下有雙谿送春水如白雲潏沔山影動喚
我芙蓉翁古僊曾入夢繞隄蒔秋英金粉露華重他年
輓鹿車一丘良可共山中頻寄書青松及時種

椒園

椒園南山下疊嶽隱幽壑曲徑緣古谿高下泉聲落懸
流注石稜繽紛挂珠絡老梅立山煙迎門如皓鶴玉樹
大十圍枝枝近高閣晨夕可來遊只須過略約

斷事墳

歎息金川門倒戈燕王師君臣有大義微官焉敢辭沈
湘竟何處爪髮空在茲荒阡邇幽館策杖不知疲仰睇
層嶺峻俛聽寒澗悲松間古碑矗摩讀夕陽時

方斷事
公諱法

聞建文之難
自投于江

環翠山房

萬峰如挺笏中央見平疇
齒齒白石粲浩浩洪谿流
兀孤茅亭傑出當高丘
羣山蒼秀色到此憑闌收
峰峰嵐氣逼樹樹煙光浮
每語吳季子數椽須蚤謀

寫園

短垣護松竹宛然一畝宮
門臨樵子路清谿流向東
昔有耽吟客自名嶽夢翁
駕鶴去不返門閉雙井桐
圖書秘全菴風景將無同
吾廬幸不遠相望蒼靄中

公麟圖
中有秘

全卷醫
第似之

長松別業

山園各殊致陂池茲所偏
疏鑿廣數畝芙蓉秋便娟
魴鯉長尺半花間時割鮮
長松四五株磊砢生寒煙
緗梅與翠竹掩映皆幽妍
妙年高寄託王謝信多賢

黃柏山房

龍眠最深處雲物迴幽宮
石徑盤山腰谿聲互縈繞
灌木何陰陰垂蘿復嫋嫋
中有樂耕堂凭闌接林杪
片石

琴臺孤飛軒粟窠小莫嫌絕境偏遠出塵壚表

社壇

幽巖罕人跡此地堪避世一水自縈紆千峰轉迢遞草
溪路易迷湍急裳屢揭吾兄性耽奇景麟結遐契遠載
吳門花驅驢入煙際選地種松杉聊為子孫計

三兄於此築景

麟堂

十二月六日即事

夢登傑閣俛洪流煙波漠漠橫小舟遠疊層巒景彌曠

近羅古木居偏幽啓牖凭闌正畱憩叩門聲急驚殘睡
東方纔曙雪滿階忽報諸卿有封事

題畫

秋山若新沐翠色滴巘巘幽人結茅宇窈窕當巔岵略
行入荒徑高柳垂碧湍時有隔谿叟策杖叩荆關斯境
良不易唯向圖中看

寄韋廣菴

昔聞王摩詰晚歲耽清修琴牀間茶竈恬曠與天游鳩

茲有偉人今古遙唱疇啓事重山簡脫展歸林丘秉心
自高潔澹蕩師虛舟揮手謝塵滓道業期千秋眠食常
一龕彌勒居上頭我友岑儀部謂羽長精義同揆搜江流
渺無際高懷誰與儔天門望牛渚石色上層樓何時躡
芳躅偕翫春江鷗

讀汲古閣毛子所鐫放翁集有感

歎息龜堂叟磊落無近情室小不舒肘時聽飢腸鳴神
藻日騫翥珠源隨地傾齒髮已太耄力厚思彌清吟篇

累鉅萬騷壇誰與京聊自寫胸次匪冀身後名冥寄
天壤大海鴻毛輕焉知五百載嗜古有毛生舊帙拭塵
土古鏡發精英語不敢遺寶惜如瑤瓊雕鏤比金石
簡編彌八紘山澤蘊良璧光氣終必呈賢哉海虞客千
禩陪休聲

自題桃花釣艇小像

春風草色已平鋪春水半篙生南湖自擢小舟入鷗鷺
臨水桃花三兩株微風徐引釣絲軟落花片片飛衣裾

此時傲睨天地寬斜倚蘭漿攤素書青山澹峙水澄湛
纖塵不起波濤無我與萬類同俛仰忘機共樂羲皇初
寄語葦間垂釣侶莫將香餌誤游魚

正月六日

春回已再旬詰朝是人日苦憶故山下古梅陰幽室苔
封老榦避香蚤南枝密披離碧礪臨橫斜短牆出輕煙
澹靄中風神總清逸江國氣暄和微風轉溫律谿潤柳
先舒土暎蘭初茁南榮可洞開北牖不須窒何事久羈

栖朔風但嚴凜難寄一枝春望斷江南驛清夢頻往來
浩歎撫書帙

夜讀松臯詩冊有作

穀雨晚休憩皓月臨階砌輕寒下布簾水僊列綈几
程子示新篇清言味殊旨冰雪盈懷抱芳香浸肌理故國
梅花邨迢迢隔江水撫卷若欣遇三復不能已

燕九

京師以正月十九日為燕九節羣之白雲觀候真人降

銓月看方殘節序數燕九白雲鸞鶴聲陳跡荒已久取

醉傾都城相將挈樽說一時方外客幻妄無不有懸符
曲背翁賣藥龐眉叟詭狀驚愚氓狂歌走邛婦哆口說
神僊誑惑良可醜我聞蓬萊峰弱水隔塵垢碧玉琢庭
階綵雲塞窗牖桃花吹香杭石髓釀天酒御風凌紫雲
天帝為賓友豈肯迴鶴駕蹋此利名數吁嗟塵世人延
望空翹首

長康為予畫芙蓉島圖賦此

雪浪雙谿向東注雲巖翠嶽相盤互短垣脩竹隱蕭齋

憑君畫出樵家路君言此地舊遊偏風景依稀在眼前
惟餘石岸蒼松色須飽風霜二十年

道士贈杏花一枝置膽餅中

大龍山畔石塘隈露裊煙籠十里開聞說如霞復如錦
可憐時節不曾來祇今盡日風塵裏乍得一枝眉色喜
粉腮未破春溶溶自拂銀餅注新水

廣濟寺看海棠即贈天孚上人

萬斛車塵吹暝風擾擾闌闌喧囂中焉知咫尺有佳地

香林一鶴塵埃空穀雨纔過名卉發紅雲兩簇樓西東
我來正值爛熳時錦幢繡幄花重重自昔西川號繁艷
海棠香國將無同別有神僊好丰骨苦教桃李若為容
最是斜陽烘屋角粉腮亂點猩猩紅惠休知予惜花意
裴回宛轉芳樹叢為言居士今老矣一年一度難遭逢
須乘旭景再來看煙開露溼春溶溶我聞斯語笑未答
發人淡省如晨鐘便是上乘微妙義不須更與叩南宗
長康畫南郭外桃花園小景題此於後

出郭春風散遙矚千株萬株柳新綠人家園圃帶城斜
桃花一片紅雲簇浴邨灼灼照清谿繞徑娟娟倚脩竹
我昔攜尊雨後來臙脂晚向華清浴隔岸誰家花最多
枳籬苔徑鄉茅屋詎意蕭齋倚短檠縮取春陰盈尺幅
向前寒食幾多時令人苦憶城南曲

天禧宮古松歌同說巖先生賦

平生幾處見古松都城西畔天禧宮輪囷異姿飽霜雪
紛拏逸勢森虬龍響若琮琤身蒼玉色疑翡翠埋青銅

低枝偃側走平地高榦窈窕摩紫穹荒祠淡鎖三十樹
一樹一畫羞雷同瑯窗細碎古瓦墜畫壁剝落莓苔封
此松類有神物守肌理豐臆彌青葱濃陰地溼草丹碧
幽林日薄光玲瓏頓隔喧囂若囁谷濤聲白晝吹香風
澤州先生偶稅駕予亦走馬來過從石牀倚徙久延望
不覺曦馭騰高春君言榼山有此樹霜皮合抱煙靄中
予亦曾遊秣陵路六朝舊樹畱江東不意馬跡車輪邊
俛仰別有幽奇蹤便當坐臥滿十日一洗耳目塵滓空

眼前奇物復誰數北寺萬石華嚴鐘

予學圃齋前有郁李一株因見樂天集中有惜郁

李花詩即次其韻

濃縛愛花繁低小憐枝弱閑階石砌邊移近梅花萼緣
條雪皚皚含煙春漠漠剪裁羅綺輕點染胭脂薄山園
久岑寂流光任銷鑠正是艷陽時東風又開落

萬壽寺華嚴鐘歌次說嶽先生韻

荒寺門迎大谿水古牆剝落荆榛高突兀鉅鐘立庑祀

翠色幾矗長松稍直立二丈徑十尺布指難與量週遭
銅液如雲火如電天地鑪冶斯鑄陶霜晨撞擊鬼神懼
鉤閱鞞韃拊紫霄上有華嚴十萬字松江沈度揮霜毫
刻畫遠勝雲雷跡雕幾不屑魚龍跳一波一撇露鋒穎
筆勢軒翥如鴻翔譬彼寶幢繡佛號香薰殿角風鈴搖
此鐘初成在紫闥丁年移及今蕭條此鐘造于丁未年
移置此寺亦丁未
劫火已吹樓殿去鯨魚委地空蒲牢但見埋光向幽壑
那復振響穿雲標竭來對此三歎息為憐塵垢還爬搔

神呵佛守亦妄語土花侵蝕假藜蒿作者何人姚少師
手翻雲雨騰螭蛟金川門外鼓震地欲富欲貴皆爾曹
鐘虛解紐意不惜戈甲渡江江怒號身披紫衣近日月
不聞搏拊陳虞韶齊黃九族慘白日天陰鬼哭聲啾嘈
忠臣義士甘鼎鑊鑄鐘萬石奚足豪噫吁嘻鑄鐘萬石
奚足豪

永樂四年製時為
姚少師廣孝監造

送登州太守任在菴之官

渤海迴紫瀾萬古岵夷宅觀日登蓬萊東望神僊迹瑤

島出波面數點如棋奕時平海若鏡拾月堪挂席蜃市
成奇觀城闕通街陌好風蕩微雲轉盼玻璃碧皇哉五
馬君聲名古牧伯彥升起中土清才燥崑壁今為郡大
夫昔本東瀛客輶車夙稅駕正獲兩岐麥涵濡須溪仁
澄清荷鉅責德化師蓋公琴書樂簡僻平生康濟心永
言念疇昔

庭槐十韻

青槐何茂密當軒種雙樹滋植十年來清陰入門路高

翠挂斜陽低枝沾曉露暑月延好風晨光集珍羽杳靄
映溪簾頓有林壑趣種此亦偶然青蔥悅朝暮豈意爾
成圓催子髮垂素愛此碧玉枝曾入甘泉賦託根賜廬
中諒無斧斤懼寄語後來人風霜謹持護

閒居四時詞

初試春衣白苧裁
熈扉從此晝常開
輕煙輕雨籠芳樹
新柳新鶯發舊醅
草閣日長簾影靜
杏花時節燕雙來
小亭霑洒近風泉
地溼林深避暑偏
翠竹萬竿疎雨夜

水芝千朵夕陽天
人間便有方壺勝
欲向三山喚僊仝
白露添衣體乍輕
山容如沐水痕清
半窗幽夢梧桐雨
一枕新涼蟋蟀聲
看罷東籬舊時菊
芙蓉花下繞池行
煙蓑雪笠釣寒江
新得鱸魚玉一雙
溪著地鱸煨芋火
洞開書閣看梅窗
閑來檢點牀頭物
螳綠鵲黃正滿缸
石谷為予畫賜金
園圖卷子復作大
幅仿香山池
上篇意為賦長歌

石谷先生類瞿鶴風神蕭散意卓犖
高人寄託無不可

偶爾落筆搖五嶽曩時驚見富春圖十丈青岑隱丹壑
神交意許三十年忽向京華走芒屨再拜喜識寒松姿
逸致高懷老磅礴俛仰都無世俗情坐上吹香比蘭蕝
自昔曾與西田翁古今風雅同揚摧祇今前輩若晨星
銜盃話舊空蕭索我家山杏靄間貌以丹青何綽約
梅花淡處著疎籬楊柳陰中藏略約一幅鵝谿池上篇
竹鴈荷汀景寥廓鄙人自愛愚谷愚先生為寫樂天樂
憐我風塵老未休苦憶谿山自煎斲譬彼井谷有枯鱗

暫轉清波供澆潯秋窗日對煙雲生懷抱經時差不惡
溼翠香嵐足千古獲落園林欣有託

東坡有和淵明怨詩楚調示龐主簿及鄧治中詩
讀而愛之遂用其韻

南山衆所見陶詠獨悠然歎息頭上霜換我鏡中年人
生如墜葉憂樂隨所偏豐腴慕朝市枯槁耽園田荷與
東臯子醉鄉受一廛晨興荷鋤往夕寢抱瓮眠歡戚等
飛埃寒暑忘推遷落花堆我側幽鳥啼我前挂瓢飲谿

水策杖入邨煙還令簡牘上干載稱豪賢

文端集卷十二